

I

ԶՄՅՈՒՌՆԻԱՅԻ ՏԵՐՈՒՆԻ ԹԵՄԻ ԱՌԱՋՆՈՐԴՆԵՐԸ

ԱԼԲԵՐՏ ԽԱՌԱՏՅԱՆ

Զմյուռնիայի առաջնորդների գավազանագրքի վերհանումը միահյուսված է էջմիածնի տերունի թեմի և դրա, որպես կրոնական ինստիտուտի, դարավոր պատմությանը: Մեկ այլ պատեհության թողնելով առ այսօր քիչ ուսումնասիրված և ազգային հանրության հետ հարաբերվելու՝ էջմիածնական այդ յուրահատուկ կառույցի ազգապահպան ու պատմական նշանակության արժևորումը, այստեղ կփորձենք շարունակել Զմյուռնիայի առաջնորդների գավազանագրքի հետազոտությունը, որ սկիզբ է առնում մեր պատմագիտության երախտավորներ Ա. Ալպոյաճյանի և Տ. Եսյ. Պայանի ուսումնասիրություններով¹: Զմյուռնիայի առաջնորդների ցանկը սկսենք այս հեղինակների միմյանցից բավականաչափ տարբեր հերթագայությամբ, թվագրումներով ու տարբերություններով՝ քննարկելով դրանք առանձին-առանձին: Նախապես նկատենք, որ Տ. Պայանն այդ ցանկը սկսում է Հովսեփ վարդապետով, 1689 թվականից, իսկ Ա. Ալպոյաճյանը՝ շատ ավելի վաղ հիշվող առաջնորդով:

1. Պոկնտոշ Կարապետ, 1614–1615:

Ա. Ալպոյաճյանը հղում է իր սկզբնաղբյուրը՝ Գ. Սրվանձտյանցի հանրահայտ աշխատությունը՝ մի ուշագրավ վավերագրով, որ անձանոթ է Տ. Պայանին: Այստեղ Գրիգոր Կեսարացին, որ քանիցս բազմել է Կ. Պոլսի պատրիարքական աթոռին (XVII դ. 1-ին կես), սաստիկ հանդիմանում է ժամանակի կաթողիկոս Մելքիսեթին՝ եկեղեցական կարգը խախտելու, ընչաքաղցության և դավանական անաղարտությունը քամահրելու համար. «Եւ Պոկնտոշ զԿարապետն որ Հոռոմ դարձաւ եւ Հոռոմ կին էաւ եւ եօթն տարի ի հետ այն կնոջն ի Հոռոմ կեցաւ, յիմայ եպիսկոպոսութեան հրաման ես տուեր եւ Թիրայու, եւ Իզմիրու եւ Մանիսայու առաջնորդ ես կացուցեր»²:

2. Տրդատ արք., 1635 թ.:

¹ Ա. Ալպոյաճյան. Առաջնորդութիւն հայոց Իզմիրի. – «Բիւզանդիոն» (Կ. Պոլիս, 1904, 14/27 – 15/28 ապրիլի, նոյնի՝ Առաջնորդութիւն հայոց Իզմիրի (առաջնորդական ընտրութեան առթիւ). – «Բիւզանդիոն», 1908, 10/23, 10/25, 13/26, 14/27, 15/28, 16/29 ապրիլի, նոյնի՝ Իզմիրի հայոց առաջնորդները. – «Դափնի» (Զմյուռնիա), 1922, թիւ 9, էջ 280–282, Տ. Եսյ. Ալպետ. Գաւազանագիրք առաջնորդաց Զմյուռնիոյ. – «Դափնի», 1921, թիւ 1, էջ 25–28, թիւ 2, էջ 59–63, թիւ 3, էջ 91–93:

² Գ. Սրվանձտեանց. Թորոս աղբար կամ ճամբորդ Հայաստանի, մասն Բ, Կ. Պոլիս, 1884, էջ 281:

Այս թվականին իր գրչագրած բժշկարանի հիշատակարանում Սարգիս երեցը գրում է. «Ես՝ անարժանս, որ սկսեցայ ի գրել զսա, որ մինչև ի կեսն որ գրեցի նայ, Աստուծոյ ողորմութեամբն մեր հոգևոր հայրն մեր և կենդանի նահատակն տէր Տրդատ արքեպիսկոպոսն հրաւիրեաց և կոչեաց զմեզ աստիճան քահանայութեան ի ձեռնադրութիւն և մեք անարժան գոլով ապաւինեցաք ի Աստուծոյ ողորմութիւն... Ելեալ զնացաք Իզմիրու և Կօզէլիիսարն որ է վիճակն Ռհաննու աւետարանչին և անդ առաք զկարգ և զպատի քահանայութեան, եկաք Իզմիր և դարձեալ սկսեցաք զայս պատուական բժշկական հեքիմարանս... Եւ ի կատարելն սորա էր թուին Հայոց ՌՁԴ (1635) յիտունիս Ժ (10)... Գրեցաւ սա ի ժամանակս և ի կաթողիկոսութեան տեսոն տէր Փիլիպոսին, որ այժմ երկրորդ լուսաւորիչն է Հայոց»³:

Արժեքավոր այս տեղեկությունը թույլ է տալիս եզրակացնելու, որ 1635-ի կողմերը Զմյուռնիայի և շրջակայքի առաջնորդանիստ կենտրոնը եղել է ոչ թե Զմյուռնիան, այլ Այսնը (Կյուզելիիսար), որտեղ և առաջնորդական պաշտոնը վարել է Տրդատ արքեպիսկոպոսը: Երկրորդ, ինչպես Պոկնտոշ Կարապետի ժամանակ, 1610-ական թթ., Զմյուռնիան (Այսն) եղել է Էջմիածնի թեմը, որ Սարգիս երեցը վկայում է Փիլիպոս կաթողիկոսի հղումով: Ավելացնենք, որ Տ. Պայյանի տրամադրության տակ այս վավերագիրը չի եղել, ուստի Տրդատ արքեպիսկոպոսը չկա նրա ցուցակում:

3. Կիրակոս Թալինցի, 1651:

Հիշատակվում է նշված թվականի մի ձեռագրում, որպես Զմյուռնիայի թեմի «վերատեսուչ» (առաջնորդ) և ինչպես ներկայանում է հիշատակարանում, «յոզնամեղի Կիրակոս Թալինցի, յերկրէն Արա[ր]ատցի, ի թեմէն Սբ. Լուսաւորչի, սնեալ և վարժեալ ի գահ իջման Սբ. Էջմիածնի, բայց ի վերջինս կոչեցեալ վերատեսուչ ի Զմիւռնի Լիկեացոց...»⁴:

Հայտնի չէ, թե երբ է Կիրակոս Թալինցին նշանակվել և թողել առաջնորդական պաշտոնը, բացի իր վկայություններից, որ 1651 թ. (իմա՝ Կանդիայի պատերազմի ժամանակ) ինքը Զմյուռնիայի առաջնորդն է, և որ այդ քաղաքի ազգաբնակչությունը կրել է պատերազմի ողջ աղետները՝ պաշարված լինելով ոչ միայն ծովից ու ցամաքից, այլև հենց թուրքերի սաստկացած բռնությունների պայմաններում:

Այս առաջնորդը ևս բացակայում է վերոհիշյալ հեղինակների ցուցակներում:

4. Ստեփանոս վարդ., 1655:

Ա. Ալպոյաճյանը հիշում է այս վարդապետին, իբրև Հակոբ Ջուղայեցու աշակերտի՝ վկայակոչելով «Դիւան հայոց պատմությունը»⁵: Ա. Ալպոյաճյանը Ստեփանոսի առաջ-

³ Հայերեն ձեռագրերի հիշատակարաններ ԺԷ դարի, հ. Բ (1621–1640), կազմ. Վ. Հակոբյան, Ա. Հովհաննիսյան, Երևան, 1958, էջ 596:

⁴ Հայերեն ձեռագրերի հիշատակարաններ ԺԷ դարի, հ. Գ (1641–1660), կազմ. Վ. Հակոբյան, Երևան, 1984:

⁵ Ա. Մաշտոցի անվան մատենադարան (այսուհետև՝ ՄՄ), Ա. Ալպոյաճյանի դիվան, թղթ. 7, վավ. 17-1: Տե՛ս նաև Դիւան Հայոց պատմութեան, Գիրք Ժ, ԺԵ–ԺԹ դարեր, հրատ. Գ. Աղանեանց, Թիֆլիս,

նորոգության տարիներն է համարում 1657–1663-ը, իսկ Դավիթ Բաղիշեցին իր ժամանակագրության մեջ հայտնում է միայն, որ 1655 թ. նա եղել է Ջմյունիայի առաջնորդը՝ լինելով, ի թիվս այլոց՝ Հակոբ Ջուղայեցի կաթողիկոսի աշակերտներից մեկը⁶: Դժվարանում ենք ասել, թե Ա. Ալպոյաճյանը ինչ աղբյուրից է օգտվել՝ այդ 1657–1663-ը նշելիս:

Տ. Պալյանն այս առաջնորդին չի հիշում:

5. Մաղաքիա եպ. Եփեսացի, վախճ. 1661 թ.:

Վկայակոչելով այս եպիսկոպոսի՝ Այտնում թաղված լինելու մասին մի դամբանագիրը (1661), որ հրապարակել է Հ. Քոսյանը, Ա. Ալպոյաճյանը ենթադրում է, որ նա «առաջնորդութեան պաշտոնով այս շրջանակը (Էգեյանի մերձափնյա տարածքներ – Ա. Խ.) գտնուած է»⁷:

Ենթադրությունը, իրոք, հավանական է, մանավանդ, ինչպես տեսանք Տրդատ. եպ. օրինակով, XVII դ. Այտնը առաջնորդական նստավայր էր:

6. Բարսեղ վարդ., 1665-ից առաջ:

Ա. Ալպոյաճյանն այս առաջնորդին հիշում է մի Ոսկեփորիկի (1665-ից առաջ) վկայակոչումով. «Իզմիր քաղաքի առաջնորդ Բարսեղ վարդապետ, եկի քաղաքն Ման... (անշուշտ, Մանիսա – Ա. Խ.) ուր Բ քահանայ ձեռնադրեցի ի Սր Լուսաւորիչ եկեղեցւոյ սպասաւոր...»⁸: Գրեթե բառացի, նույնն է ասված, սակայն առանց Ոսկեփորիկի և 1665 թ. հիշատակության, Տ. Պալյանի գավազանագրքում⁹:

Բարսեղ վարդ. մասին այլ տվյալ մեզ հայտնի չէ:

7. Հովսեփ վարդ., 1683–1706:

Տ. Պալյանն իր գավազանագրքում առաջինը նշում է այս առաջնորդին՝ հենվելով 1689 թ. Ջմյունիայի Ս. Ստեփանոս և Ս. Բարդուղիմեոս եկեղեցու նորոգության արձանագրության վրա, որտեղ հիշվում է Իզմիրի առաջնորդ Հովսեփ վարդապետը¹⁰:

1912, էջ 52: Մանր ժամանակագրություններ, XIII–XVIII դդ., հ. 2, կազմ. Վ. Հակոբյան, Երևան, 1956, էջ 361:

⁶ Մանր ժամանակագրություններ, հ. 2, էջ 361:

⁷ Ա. Ալպոյաճյան. Իզմիրի հայոց առաջնորդները, էջ 280: Հ. Քոսյան. Ակնարկ մը հնութեան բեկորներու. – «Հանդէս ամսօրեայ», 1906, թիւ 9, էջ 279:

⁸ ՄՄ, Ա. Ալպոյաճյանի դիվան, թղթ. 7, վավ. 17–1, էջ 72:

⁹ Տ. Պալեան. նշվ. աշխ., թիւ 2, էջ 59:

¹⁰ Տ. Պալեան. նշվ. աշխ., թիւ 1, էջ 25–26: Այս արձանագրությունը ուշագրավ է մեկ այլ լուսաբանությամբ նս. «ես Իզմիրու առաջնորդ Յովսեփ վարդապետս, ապաւինեցայ յողորմութիւն Աստուծոյ ի սուրբ Ստեփաննոս և ի սուրբ Բարդուղիմեոսս եւ զեկեղեցիս հիմնարկեցաք», ասված է այնտեղ: Դարձվածը վկայում է, որ Ջմյունիայում XVII դ. եղել է մեկ եկեղեցի՝ երկու սրբերի անվամբ: Ձեռագրերում՝ սկսած 1625 թվականից, այն քանիցս հիշատակվում է նրանցից կա՛մ մեկի (Ս. Ստեփանոս), կա՛մ մյուսի (Ս. Բարդուղիմեոս) անվամբ, որ կարող էր մղել այն կարծիքին, թե զմյունահայերը երկու եկեղեցի են ունեցել: Խնդրո առարկա արձանագրության մեջ եկեղեցու լրիվ

Ա. Ալպոյաճյանը Տ. Պայանի հիշատակած այս վավերագրին հավելում է այլ տեղեկություններ Հովսեփ վարդ. վերաբերյալ. Հովսեփը հիշվում է Մանիսայի Ս. Լուսավորիչ եկեղեցու զանգակատան՝ 1661 թ. արձանագրության մեջ, ըստ Հ. Քոսյանի՝ 1686–1687 թթ. Վենետիկում գտնվելը և հայերեն մի գրքի տպագրությանը մասնակցելը, 1691 թ. առաջնորդական պաշտոնը շարունակելը, 1696 թ. Կ. Պոլսում լինելը ու կաթոլիկություն քարոզելը, Ավետիք պատրիարքի հրահանգով բանտարկվելը, 1706 թ. դեռ ողջ լինելը՝ հիշվում է Աղեքսանդր կաթողիկոսին պոլսահայերի կողմից գրված մահերում (հանրագիր), և վերջապես, որպես Էջմիածնի նվիրակ ու Զմյուռնիայի առաջնորդ, հիշվում է Հովսեփ արք. Քյոլեյանը, որ կաթոլիկ էր, և կաթողիկոսը նրան Հոռոմ պետք է ուղարկեր, եթե մահը չկանխեր: «Հիմա հետաքրքրական է ճշդել, թե 1661-ին մինչև 1706 յիշատակուած Զմիւռնիոյ առաջնորդ Յովսէփը միննոյն անձն է, թէ իրարմէ տարբեր երկու անձեր են: Այս հանգոյցը փափագելի էր, որ լուծուէր»¹¹, – գրում է Ա. Ալպոյաճյանը:

Կարելի է մեկ կարևոր տվյալ ավելացնել Զմյուռնիայի առաջնորդ Հովսեփ վարդ. կենսագրությանը, որ, կարծում ենք, ամրագրում է նրա առաջնորդական պաշտոնի սկիզբը: Մատենադարանում պահվող՝ Փիրղալեյանի հավաքածուի մի ձեռագրում (Հիշատակարան, պահված է եղել Զմյուռնիայի եկեղեցում) ինքը՝ Հովսեփ վարդ. հայտնում է. «Թուին ՌՃԼԲ (1683) յօգոստոս քսանվեց ես Յովսէփ վարդապետս Բզմիրո առաջնորդ և (իմ) փոքրաւորն Ազարիայն այս թուիս մտանք Բզմիրս. Եւ այս թուիս յունիս մէկն էլանք ի սուրբ Էջմիածնէն դէպի Բզմիրս»¹²:

Հետևաբար, Հովսեփի առաջնորդության սկիզբը պետք է համարել 1683-ը և այս դեպքում Հ. Քոսյանի վկայակոչած՝ Մանիսայի եկեղեցու 1661 թ. արձանագրության մեջ հիշվող Հովսեփի ինքնությունը, թվում է, կորցնում է իր նշանակությունը, որովհետև նա չի նշվում որպես առաջնորդ: Ա. Ալպոյաճյանը ևս կանգ է առնում այս հանգամանքի վրա՝ նկատելով, թե այդ արձանագրության մեջ «չըսւիր, թէ առաջնորդ է»¹³: Մնում է, ուրեմն, ճշտել Հովսեփի ինքնությունը 1689 (Ս. Ստեփանոս եկեղեցու արձանագրությունը) – 1706 (այդ թվականին՝ Հովսեփի մասին վերջին տեղեկությունը) ժամանակահատվածում:

Վերադառնանք Մանիսայի եկեղեցու 1661 թ. վերոհիշյալ արձանագրությանը: Որևէ կապ չունենալով Հովսեփի բուն առաջնորդական գործունեության հետ, այսուհանդերձ, այն օգնում է բացահայտելու կամ ճշտելու այդ գործունեության ժամանակային կտրվածքը: Եթե նրա առաջնորդության ժամանակը 1661–1706 թթ. երկար ու ձիգ տարի-

անվան հիշատակումը այս իմաստով վերջ է դնում որևէ տարակուսանքի: Զմյուռնահայերը երկրորդ եկեղեցին ունեցել են շատ ավելի ուշ՝ 1801-ից՝ Ս. Լուսավորչյան եկեղեցին:

¹¹ Ա. Ալպոյաճյան. Բզմիրի հայոց առաջնորդները, թիւ 9, էջ 281: Հովսեփի մասին Ա. Ալպոյաճյանի դիտողությունները՝ տե՛ս նույն տեղում, էջ 280–281:

¹² ՄՄ, Փիրղալեյանի հավաքածու, ձեռ. 6332, էջ 251ա:

¹³ Ա. Ալպոյաճյան. Բզմիրի հայոց առաջնորդները, թիւ 9, էջ 280:

ների ընթացքը կասկածի կամ ճշտման տեղիք կարող էր տալ, ապա նույնը չի կարելի ասել 1683–1706 թթ. ժամանակահատվածի համար, որտեղ Հովսեփին վերաբերող տվյալների և ամենից առաջ՝ առաջնորդական շրջանի տրամաբանության մեջ ոչ մի տարակուսելի բան չկա: Հետևաբար, շատ հավանական է, որ Հովսեփը կամ Հովսեփ Քյուլեյանը միևնույն անձը լինի, ով հիշվում է 1683–1706 թթ. մեր դիտարկած բոլոր վավերագրերում, այսինքն՝ Էջմիածնի նվիրակը և առաջնորդը Զմյուռնիայում՝ այդ տարիներին:

8. Իզնատիոս Միականի, 1670-ից առաջ:

Այս հոգևորականը չի մտել ո՛չ Ա. Ալպոյաճյանի, ո՛չ էլ Տ. Պայյանի ցուցակի մեջ: Ե. Քյումուրճյանի՝ 1670 թ. մի գրության մեջ նա հիշվում է որպես Էջմիածնի նվիրակ (որ հոմանիշ է առաջնորդին)՝ բացասական թանձր գույներով. «Իզնատիոս Միականի, նուիրակ Էջմիածնայ կրկին կրկին չափով ծախէր զմեռոնն յոյժ անիրաւութեամբ, ի սահմանս Զմիւռնոյ յանկարծ մեռաւ ի գիւղս տաճկաց»¹⁴: Ուրեմն, Իզնատիոսը նվիրակ և առաջնորդ է եղել այդ թվականին կամ դրանից առաջ, առավել հավանական է՝ 1660-ական թթ., երբ սրվել էր պայքարը Հակոբ Ջուղայեցու և Եղիազար Այնթափցու միջև՝ Օսմանյան Թուրքիայում Էջմիածնի իրավունքների շուրջ¹⁵: Եղիազարին սատարող Ե. Քյումուրճյանը (անշուշտ, ոչ բոլոր, այդ թվում և Էջմիածնին հակաթոռ կաթողիկոսություն ստեղծելու հարցերում) հանգամանորեն խոսում է Հակոբ կաթողիկոսի կողմնակիցների, նրանց հետ և Իզնատիոս Միականու վախճանի մասին:

Առաջնորդների ցանկում Ա. Ալպոյաճյանը, և նրա հետևությամբ Տ. Պայյանը, զետեղել են Գրիգոր վարդ. Սամուելյանին՝ XVII դ. վերջ – XVIII դ. սկիզբ կտրվածքով: Նշում են նաև, որ այս անձը հայտնի է Տերեայի ծածկանվամբ, իբրև աշուղ, երգել է հայերեն և թուրքերեն: Տ. Պայյանը, ցավոք, չի նշում իր աղբյուրը¹⁶: Ա. Ալպոյաճյանի համոզիչ կարծիքով, Տ. Պայյանի տվյալները «վերաքննութեան կը կարօտին, վասնզի իրեն առաջնորդութեան համար որոշուած ժամանակամիջոցը կանցնի Յովսեփ եպս.-ի»¹⁷: Հիրավի, վերը տեսանք, որ Հովսեփն է եղել Զմյուռնիայի առաջնորդը 1683–1706 թթ., որի սահմաններում էլ Տ. Պայյանը կասկածելիորեն տեղ է վերապահում Գ. Սամուելյանին:

¹⁴ Գր. Գալէմբէարեան. Կենսագրութիւններ երկու հայ պատրիարքներու և տասն եպիսկոպոսներու և ժամանակին հայ կաթողիկէայք, Վիեննա, 1915, էջ 73:

¹⁵ Իսկապես, առհասարակ Օսմանյան Թուրքիայում Էջմիածնի իրավունքների (թեմեր տնօրինելու, Կ. Պոլսի և Երուսաղեմի պատրիարքությունների և Սսի ու Աղթամարի կաթողիկոսությունների նկատմամբ Էջմիածնի գերագահության և ազդեցության գործոնը) և ոչ թե սոսկ «մեռոն օրհնելու ու մեռոն բաշխելու՝ Էջմիածնի կաթողիկոսների մենաշնորհը վիճարկելու» վերաբերյալ պարզունակ ձևակերպումը, որ ի հայտ է եկել խորհրդային ժամանակներում (տե՛ս Հայ ժողովրդի պատմություն, հ. IV, Երևան, 1972, էջ 125):

¹⁶ Ա. Ալպոյաճեան. Առաջնորդութիւն հայոց Իզմիրի, 12/25 ապրիլի: Տ. Պալեան. նշվ. աշխ., թիւ 1, էջ 26:

¹⁷ Ա. Ալպոյաճեան. Իզմիրի հայոց առաջնորդները, էջ 281:

9. Հայրապետ վարդ., 1715:

XVIII դ. առաջին առաջնորդներից մեկն է, որ հիշվում է Փիրդալեմյանի հավաքածուի մի հիշատակարանում. «Գրեցաւ զիրս գաւազան տալոյ իշխանութեան վարդապետականի ի թուաբերութեան Հայոց ՌՃԿԴ (1715) ամին ի մայիսի 21 ի վայելում տեառն Հայրապետի աստուածաբան վարդապետի, որ է առաջնորդ Զմիւռնի քաղաքի լիկէացւոց և նահանգի նորին, որ է ուղղափառ վարդապետ Հայաստանեայց եկեղեցւոյ և քարոզ ճշմարտութեան»¹⁸:

Այս առաջնորդի մասին այլ տեղեկություններ մեզ հայտնի չեն:

10. Ներսես եպ. Եփեսոսի, 1717:

Հիշատակվում է Ա. Ալպոյաճյանի ցանկում՝ Հովհ. Ոսկերբեբանի «Մեկնութեան» 1717 թ. տպագրության հիշատակարանի հղումով, որտեղ հիշվում է «զգերապատիւ զՆերսէս եպիսկոպոսն Եփեսոսի»: Ա. Ալպոյաճյանը, բնականաբար, Զմյուռնիային կից Եփեսոսը առանձին թեմ չի համարում և իրավամբ կարծում է, որ Ներսեսը պարզապես «Եփեսացի» տիտղոսով էր վարում նույն Զմյուռնիայի առաջնորդությունը¹⁹:

11. Միմեոն վարդ., 1718:

Ա. Ալպոյաճյանի ցանկում անմիջապես հետևում է Ներսես եպիսկոպոսին, ընդամին, պատմաբանը վկայաբերում է Աստվածատուր կաթողիկոսի 1718 թ. մի կոնդակը, որտեղ վերջինս Վենետիկի հայ վաճառականներին պատվիրում է ինչ-ինչ իրեր առաքել Զմյուռնիայի առաջնորդ Միմեոն վարդապետին²⁰: Տ. Պալյանի գավազանագրքում տեղ չեն գտել ո՛չ Ներսես եպիսկոպոսը, և ո՛չ էլ Միմեոն վարդապետը:

12. Ղազար Զահկեցի, 1735–1737:

Հիշյալ թվականներին վարել է նվիրակության պաշտոնը՝ ըստ Տ. Պալյանի, իսկ նրանից առաջ 1737-ը ամրագրել է Ա. Ալպոյաճյանը²¹: Պաշտոնավարությունից անմիջապես հետո, ընտրվել է Էջմիածնի կաթողիկոս: Մ. Օրմանյանը առավել որոշակիորեն նշում է, որ Զահկեցին կաթողիկոս է ընտրվել 1737 թ. հուլիսին և Էջմիածին է մեկնել իր առաջնորդական պաշտոնատեղիից²²:

13. Մինաս արք. Փերվազյան, 1735:

Ըստ Ա. Ալպոյաճյանի՝ առաջնորդ է եղել 1736 թ., իսկ մենք կավելացնեինք՝ թերևս - Ղազար Զահկեցուց առաջ, 1935-ին, մի կարճ ժամանակ, որովհետև վերջինս իր պաշտոնավարությունը սկսելով 1735-ին, շարունակել է վարել մինչև 1737-ը ներառյալ: 1736 թ. նա՝ «Զմիւռնիոյ արքեպիսկոպոս առաջնորդն» արդեն գտնվում էր Իտալիայում, որ-

¹⁸ ՄՄ, Փիրդալեմյանի հավաքածու, ձեռ. 6332, էջ 268-ա:

¹⁹ Ա. Ալպոյաճյան. Իզմիրի հայոց առաջնորդները, էջ 281:

²⁰ Նույն տեղում:

²¹ Տ. Պալյան. նշվ. աշխ., էջ 26: Ա. Ալպոյաճյան. Առաջնորդություն հայոց Իզմիրի, 1904, 12/25 ապրիլի:

²² Մ. Օրմանյան. Ազգապատում, հ. Բ, Էջմիածին, 2001, էջ 3373–3374:

տեղ ընդունել էր կաթողիկոսություն և «Մխիթարեանց քով հաստատուեցաւ իբրեւ ձեռնադրիչ եպիսկոպոս... եւ 24 դեկտեմբեր 1757-ին վախճանելով...»²³: Համենայն դեպս, 1736 թ. նա արդեն իր պաշտոնը չէր վարում և գտնվում էր Բտալիայում, թեև հիշվում է թողած պաշտոնով: Նրա առաջնորդությունը այդ թվականով ամրագրելը մեզ համար ունի զուտ պայմանական, ճշտման կարիք ունեցող նշանակություն, որն իր հերթին, ճշգրտում պետք է մտցնի նաև Ղազար Զահկեցու պաշտոնավարության ժամանակը սահմանելիս:

14. Աղեքսանդր եպ. Բյուզանդացի (Գարագաշ), 1743–1745:

Ա. Ալպոյաճյանը և Տ. Պալյանը Գարագաշի առաջնորդության տարիները ամրագրում են 1743 և 1745 թվականներով, ընդամին, վերջինս հենվում է այդ թվականների՝ Ս. Ստեփանոս եկեղեցու արձանագրության և Հ. Նալյան պատրիարքի տպագրած «Մեկնություն Նարեկի» գրքի հիշատակարանի վրա²⁴:

Ա. Ալպոյաճյանը կասկածում է ժամանակագրորեն Գարագաշին հետևող (1746) Պետրոս վարդապետի առաջնորդությունը՝ վկայակոչելով Այսնի եկեղեցու մի տեսրակում արված ժլատ գրառումը՝ «ի ժամանակս Պետրոս վարդապետին» դարձվածով²⁵: Ըստ երևույթին, Տ. Պալյանը կրկնել է Ալպոյաճյանի կամ նրա աղբյուրի տեղեկությունը՝ ինքն էլ կասկածելով Պետրոս վարդապետի վերաբերյալ տվյալների ստուգությանը²⁶:

Աղեքսանդր Բյուզանդացին 1753 թ. ընտրվել է Էջմիածնի կաթողիկոս:

15. Սահակ (Բսահակ) Ա Ահագին, 1754–1755:

Ա. Ալպոյաճյանը նրան թվագրել է 1755-ով՝ իբրև առաջնորդի, Կոլոտ Հովհաննես պատրիարքի աշակերտի և հենվելով Ալ. Գարագաշ կաթողիկոսի կոնդակի վրա՝ ուղղված «Նախ սիրեցելոյն եղբորն մերոյ Բսահակ և առաջնորդին մերոյ աստուածաբան վարդապետին»²⁷: Սահակ Ահագինը կաթողիկոս է ընտրվել Բյուզանդացու մահից հետո (1755), բայց Էջմիածին չի գնացել, պաշտոնը չի ստանձնել և միայն 1759 թ. կաթողիկոս է ընտրվել Հակոբ Շամախեցին: Բնքը՝ Սահակը, վախճանվել է 1763 թ.՝ Էրզրումի Ս. Լուսավորիչ վանքում²⁸: Գր. Գալեմբյարյանը ևս Սահակի փաստական հրաժարումը նշե-

²³ Գր. Գալեմբյարեան. Կենսագրություն Սարգիս արքեպ. Սարաֆեան և ժամանակին հայ կաթողիկեայք, Վիեննա, 1908, էջ 224: Այն, որ 1736 թ. Մինաս արք. գտնվում էր Բտալիայում, որտեղ տարել էր Ս. Հռիփսիմեի նշխարների մի մասը, առաջինը հայտնում է Ս. Չամչյանը (տե՛ս Ս. Չամչեան. Պատմություն հայոց, հ. Գ, Երևան, 1984, էջ 573: Տե՛ս նաև Ղ. Ալիշան. Հայ-Վենետ կամ յարընչությունը հայոց եւ Վենետաց, Վենետիկ, 1896, էջ 343):

²⁴ Ա. Ալպոյաճեան. Առաջնորդություն հայոց Բզմիրի, 1904, 12/25 ապրիլի: Տ. Պալեան. նշվ. աշխ., էջ 26–27:

²⁵ Ա. Ալպոյաճեան. Առաջնորդություն հայոց Բզմիրի, 12/25 ապրիլի:

²⁶ Տ. Պալեան. նշվ. աշխ., էջ 27:

²⁷ Ա. Ալպոյաճեան. Առաջնորդություն հայոց Բզմիրի, 12/25 ապրիլի:

²⁸ Նույն տեղում:

լով՝ հայտնում է, որ նա մինչ այդ Զնյունահայի առաջնորդն էր²⁹: Մ. Օրմանյանը նրա առաջնորդության տարին նշում է 1754-ը³⁰, Տ. Պալյանը՝ 1755-ը³¹, սակայն անհայտ է մնում, թե նախընթաց որ տարվանից է սկսվում Սահակի առաջնորդությունը:

16. Աբրահամ Աստապատցի, 1756–1764:

Առաջնորդն էր Սահակ Ահագնից հետո³²: Աբր. Աստապատցին Զնյունահայում ծավալել է կրթական-լուսավորական գործունեություն, նրա առաջնորդության ժամանակ՝ 1759 թ. հիմնվում է Մահտեսի Մարկոսի տպարանը, որտեղ տպագրվել է երեք գիրք, այդ թվում և Եզնիկի աշխատությունը (1762): Աստապատցին Միսեոն կաթողիկոսին աջակցել է ոչ միայն մշակութային անդաստանում, այլև ընդառաջել Կ. Պոլսի պատրիարքարանը վերահսկելու նրա ձգտումներին՝ կաթողիկոսական փոխանորդի միջոցով³³: Ոչ օսմանյան իշխանություններին, և ոչ էլ Կ. Պոլսի հայ վերնախավին այս մտահղացումը չէր կարող ընդունելի լինել և արքունական հրամանով նրան հեռացնում են Կ. Պոլսից³⁴: Մ. Մսերյանցն իր հերթին նկատում է, թե Աստապատցին է Կ. Պոլսում Էջմիածնի փոխանորդություն հաստատելու հարցը հղացողը³⁵:

17. Ղուկաս Կարնեցի, 1764–1775:

Միսեոն կաթողիկոսը 1764 թ. մարտի 10-ի կոնդակով հայտնում է Զնյունահայի և թեմերի ժողովրդին, որ առաքում է «առաջնորդին ձերոյ Ղուկաս աստուածիմաստ վարդապետիդ, որ եկեալ այդր»³⁶: Ինքը՝ արդեն կաթողիկոս օծված Ղուկասը, 1780 թ. սեպտեմբերի 7-ին զնյունացիներին հղած կոնդակում նշում է իր առաջնորդության ժամանակը. «Քանզի մինչև ես տակաւին ի գործ նուիրակութեան և առաջնորդութեան մայրաքաղաքիդ Զմիւռնիոյ և համայն օրհնեալ վիճակացդ յամս երկոտասան», այսինքն, 1764–1776 թթ: Կարելի է կարծել, որ Ղուկասը մեկ տարով ավելացնում է իր պաշտոնավարման ժամանակը, ինչը կոտեսնենք ստորև: Ե՛վ Ա. Ալպոյաճյանը, և՛ Տ. Պալյանը ենթադրաբար, բայց ճիշտ նշում են Ղուկասի առաջնորդության սկիզբը (1764), սակայն սխալվում են 1780-ը (երբ Ղուկասը կաթողիկոս ընտրվեց) համարելով նրա պաշտոնավարման ա-

²⁹ Գր. Գալէմբեարեան, Յարութիւն Գ. Լեւոնեան. Կ. Պոլսեցի, արք. Կեսարիոյ Պաղեստինացոց.– Հանդէս ամսօրեայ, 1913, թիւ 9, էջ 553–554: Տե՛ս նաև Մանր ժամանակագրություններ, XIII–XVIII դդ., հ. 2, կազմ. Վ. Հակոբյան, Երևան, 1951, էջ 342: Սահակ Ահագնի և Էջմիածնի միաբանության՝ 1756 թ. հետո էլ շարունակվող ոչ միանշանակ հարաբերությունների մասին տե՛ս ՄՄ, Կաթողիկոսական դիվան, թղթ. 2, վավ. 12, որտեղ Սահակն ընդունում է իր կաթողիկոսական պաշտոնը, իբրև «Տէր Բսահակ, Կաթողիկոս ամենայն հայոց»:

³⁰ Մ. Օրմանեան. նշվ. աշխ., էջ 3454:

³¹ Տ. Պալեան. նշվ. աշխ., էջ 27:

³² Ա. Ալպոյաճեան. Առաջնորդութիւն հայոց Բզմիրի: Տ. Պալեան. նշվ. աշխ., էջ 27:

³³ Տե՛ս Մ. Չամչյան. նշվ. աշխ., հ. Գ, էջ 872:

³⁴ Տե՛ս Մ. Օրմանեան. նշվ. աշխ., էջ 3519:

³⁵ Մ. Մսերեանց. Պատմութիւն կաթողիկոսաց Էջմիածնի, 1763–1831, Մոսկվա, 1876, էջ 1:

³⁶ ՄՄ, Կաթողիկոսական դիվան, թղթ. 243, վավ. 22:

վարտի տարին³⁷: Ճիշտ է, Տ. Պալյանն այստեղ հավելում է՝ «բայց 1775-ին Ջմիռնիոյ առաջնորդ Եսայի վարդապետ մը կը յիշուի, գուցէ ասիկայ առաջնորդի բացակայ եղած ժամանակները փոխանորդութեան պաշտօն կը վարէր, այս մասին չենք կրնար որոշ քան մը ըսել»³⁸:

Բայց Ղուկասը Էջմիածին է կանչվել 1775-ին (և ոչ թե 1780-ին), իսկ նրա փոխարեն Ջմիռնիա է ուղարկվում նոր առաջնորդ՝ այդ նույն Եսայի վարդապետը: 1775 թ. Միմեոնը «Թուրթ մի ևս ի վերայ Ամստերդամու հայկազուն ժողովրդոյն գրեաց և զԵսայի վարդապետն նուիրակ և առաջնորդ յղելն ի Ջմիռնին և զՂուկաս վարդապետն խնդրելն ծանոյց նոցա»³⁹:

18. Եսայի վարդ., 1775–1779, 1782–1784:

Եսային առաջնորդ է նշանակվել երկու անգամ. նախ, ինչպես տեսանք, Միմեոնի կողմից, 1775 թ., երբ Եսային փոխարինեց Ղուկասին, և որի մասին Մ. Օրմանյանը գրում է շատ որոշակի. «Եսայի վարդապետ յաջորդ նշանակուեցաւ և 1775 յունիս 23-ին ճամբայ ելաւ»⁴⁰: 1779 թ. Եսային առաջնորդությունը հանձնել է Փիլիպոսին, ինչպես այդ մասին Ամստերդամի ազգայիններին էր հայտնում Միմեոն կաթողիկոսը⁴¹, իսկ 1782 թ. մայիսին նա կրկին առաջնորդ է նշանակվում՝ փոխարինելով Փիլիպոսին⁴²: Տ. Պալյանի աշխատության մեջ Եսային և այս Փիլիպոսն առհասարակ չեն հիշվում, նրա ցուցակում Ղուկասից հետո նշվում է Իսահակ եպ. (նույնպես Սահակ Ահագին) առաջնորդությունը՝ 1784 թ., և դրան հետևող «քանի մը տարիներ»,⁴³ որ ճիշտ չէ, ինչպես կտեսնենք ստորև:

Եսային վախճանվել է Ջմիռնիայի առաջնորդի և նվիրակի պաշտոնում. նրա մահվան մասին զմյուռնացիները հայտնել էին Ղուկաս կաթողիկոսին, ինչը հիշում է վերջինս՝ 1784 թ. նրանց ուղղած թղթում⁴⁴:

19. Փիլիպոս եպ., 1779–1782:

Առաջնորդ՝ Եսայու կրկնակի առաջնորդական շրջանների միջև: Ա. Ալպոյաճյանը գրում է, որ «իզմիրցիք զինքը 1782-ին մերժած են»⁴⁵: Ի դեպ, Ջմիռնիայի թեմում առաջ-

³⁷ Ա. Ալպոյաճյան. Առաջնորդություն հայոց Իզմիրի, 1904, 13/26 ապրիլի: Տ. Պալեան. նշվ. աշխ., էջ 28:

³⁸ Տ. Պալեան. նշվ. աշխ., էջ 28:

³⁹ Դիւան հայոց պատմութեան, Գիրք Ը, Միմեոն կաթողիկոսի յիշատակարանը (1767–1776), հրատ. Գ. քահ. Աղանեանց, Թիֆլիս, 1908, էջ 452–453: Ինքը՝ Ղուկասը, Էջմիածին է վերադարձել 1776 թ., ինչպես գրում է ինքը (Դիւան հայոց պատմութեան, Գիրք առաջին, Ղուկաս Կարնեցի, հ. Ա, 1780–1785, աշխատասիրութ.՝ Վ. Գրիգորյանի, Երևան, 1984, էջ 103):

⁴⁰ Մ. Օրմանեան. նշվ. աշխ., էջ 3627:

⁴¹ Դիւան հայոց պատմութեան, Գիրք ԺԱ, էջ 321:

⁴² Դիւան հայոց պատմութեան, Գիրք առաջին, էջ 303:

⁴³ Տ. Պալեան. նշվ. աշխ., էջ 28:

⁴⁴ Դիւան հայոց պատմութեան, Գիրք առաջին, էջ 420: Տե՛ս նաև ՄՄ, ձեռ. 2803, էջ 498:

նորդի նշանակումը Էջմիածնի համար դուրսին և միանշանակ գործ չէր 1770–1780-ական թթ.: 1782 թ. առաջին եռամյա ժամկետը լրացնելով՝ Փիլիպոսն ընդհարվել է զմյուռնահայերի հետ, ուստի հետ է կանչվել Էջմիածին՝ իր պաշտոնը զիջելով Եսայուն: Բայց Եսային նույնպես չի լրացրել իր պաշտոնավարման երկրորդ եռամյան և 1779 թ. վերադարձել է Էջմիածին: Փիլիպոսի նշանակումը ի սկզբանե հարթ չի ընթացել. մեկ անգամ նրա պաշտոնը Միմեոնի կողմից հաստատվելուց հետո, Ղուկասը նրան վերահաստատել է 1780 թ., հանձնարարելով զմյուռնացիներին, որպես «ծայրագոյն նուիրակի և առաջնորդի... վերստին ունիցիք ի սէր ըստ ամենայնի»⁴⁶: Այս վերահաստատման տարին էլ, թերևս, հիմք է տվել Ա. Ալպոյաճյանին՝ թվագրելու Փիլիպոսի առաջնորդության տարիները 1780–1782 թվականներով:

20. Միքայել վարդ., 1784 թ. մայիս–դեկտեմբեր:

Այս առաջնորդը չի հիշվում որևէ առաջնորդական ցանկում: Վախճանված Եսայի վարդ. քեռորդին էր, ում մասին Ղուկասը հայտնում է 1784 թ. մայիսի 16-ի իր կոնդակում՝ «ի վերայ բոլոր երկրին Չմիւռնու սակս կարգելոյն Միքայել վարդապետին ի տեղի Եսայեայ հանգուցեալ վարդապետին»⁴⁷: Կաթողիկոսը նույնն է ծանուցում զմյուռնահայ երևելիներ Աստվածատուր Ապրոյանին և մահտեսի Կ. Չելիկյանին⁴⁸: 1784 թ. դեկտեմբերի 22-ին Ղուկասը, սակայն, ի պատասխան «Միքայել պետի» խնդրանքի՝ երկարաձգել իր մնալը Զմյուռնիայում, կտրուկ առաջարկում է նրան վերադառնալ Էջմիածին. «յամենալն քո ոչ օգուտ բերէ քեզ, այլ փութա օր մի յառաջ դիմել ի սուրբ Աթոռս»⁴⁹:

21. Գալուստ վարդ., 1785–1790:

1784 թ. հետո Տ. Պալյանը չորս տարի բաց է թողնում՝ առաջնորդական աթոռը զբաղեցված տեսնելով միայն 1788-ին՝ ի դեմս Գալուստ վարդապետի⁵⁰, ընդամին, չնշելով նրա առաջնորդական պաշտոնի ավարտը: Ուշագրավ է նրա կողմից Կ. Չելիկյանին ուղղված Ղուկաս կաթողիկոսի 1790 թ. հուլիսի 25-ի կոնդակի վկայակոչումը, որով կաթողիկոսը հորդորում է իր հասցեատիրոջը «Հոգևոր որդւոյն մերոյ Գալուստ հանճարունակ վարդապետին օժանդակել ի գործսն մինչև վճարեցէ, որ ըստ մերս վարկման, մինչ ի ժամանելս թղթոյս այդր թերևս յաւարտ իցէ հասուցեալ զնուիրակութիւն և ի պատրաստութիւն վերադարձման լինիցի: Եւ մեք մտադրեալ եմք Աստուծով դէպի աշնան եղանակն զնոր նուիրակ և առաջնորդ պատրաստել և ուղեւորել...»⁵¹:

⁴⁵ Նույն տեղում:

⁴⁶ ՄՄ, Կաթողիկոսական դիվան, թղթ. 243, վավ. 51:

⁴⁷ Դիվան հայոց պատմության, Գիրք առաջին, էջ 421: ՄՄ, Կաթողիկոսական դիվան, թղթ. 5, վավ. 32, էջ 8:

⁴⁸ ՄՄ, Կաթողիկոսական դիվան, թղթ. 5, վավ. 32, էջ 7:

⁴⁹ Դիվան հայոց պատմության, Գիրք առաջին, էջ 493:

⁵⁰ Տ. Պ ա լ ե ա ն. նշվ. աշխ., էջ 28:

⁵¹ Նույն տեղում:

Դրանից հետո կաթողիկոսը, անկասկած, իր մտադրությունը կատարել է՝ Գալուստ վարդապետից հետո, 1791 թ. որպես նոր առաջնորդ և նվիրակ ուղարկելով Բսահակին, որին կանդրադատնանք քիչ անց: Կաթողիկոսի վերոհիշյալ կոնդակից պարզվում է, որ Գալուստը 1790 թ. արդեն ավարտել էր իր նվիրակության շրջանը, որ կարող էր տևել երեք և ավելի տարիներ՝ ըստ ավանդույթի: Ուստի և Գալուստի նվիրակության սկիզբը կարելի է համարել Տ. Պայյանի նշած՝ 1788-ից առնվազն երեք տարի հետ ընկած շրջանը, ավելի ճիշտ՝ 1785 թվականը, մանավանդ, ինչպես տեսանք, Միքայել վարդապետը 1784 թ. զբաղեցնում էր իր պաշտոնը և նոր առաջնորդը (Գալուստը) Ջմյունհիա կարող էր գնալ 1785 թվականին:

22. Սահակ (Բսահակ) Բ Ահագին, 1791–1793:

Ա. Ալպոյաճյանը նրա առաջնորդության տարին է համարում 1790–1793 թթ.⁵², մինչդեռ Բսահակը Ջմյունհիա է ուղարկվել 1791 թ., ինչպես տեղեկացնում է Ղուկաս կաթողիկոսը Հովսեփ Արղությանին⁵³: Տ. Պայյանը Սահակի (կամ Բսահակի) առաջնորդության սկիզբը սխալմամբ համարում է 1784-ը, որ ճիշտ չէ: «Մա իբր Էջմիածնայ նուիրակ Կ. Պոլիս եկած է 1884-ին եւ նոյն տարին Բզմիր դրկուած է առաջնորդութեան պաշտօնով,– գրում է նա:– Կերելի, թէ հազիւ քանի մը տարիներ պաշտօն վարած է եւ կըսուի, թէ վախճանած է ի Ջմիւռնիա»⁵⁴: Տ. Պայյանը, կարելի է կարծել, կրկնել է Հ. Ասատուրի թույլ տված անճշտությունը. Թորոս եպ. Սսեցին, գրում է վերջինս, Կիլիկիայի կաթողիկոս օծվեց Կ. Պոլսում, 1784 թ. սեպտեմբերին, «Այդ միջոցներուն Էջմիածնէն նուիրակ եկած էր Պոլիս Սահակ վարդապետ... Սահակ կատեր Չաքարիա պատրիարքը եւ օր մը վիճարանութեան մը պահուն բարկանալով ապտակեց զայն: Կաթողիկոսը, լսելով իրողութիւնը, անմիջապէս Սահակի տեղ իբր նուիրակ դրկեց Պոլիս նախորդ նուիրակ Մինաս եպիսկոպոսը, իսկ Սահակ Ահագին (*1792) (իմա վախճ. 1792 թ. – Ա. Խ.) գնաց Բզմիր իբր առաջնորդ»⁵⁵:

Հ. Ասատուրը ճիշտ չի նշում Սահակի վախճանի, ուրեմն և առաջնորդության ավարտի տարին, մինչդեռ վերջինս մահացել է Ջմյունհայում, իբրև առաջնորդ և նվիրակ՝ 1793 թ. նոյեմբերից մի երկու ամիս առաջ⁵⁶:

23. Դանիել արք., 1793–1797:

⁵² Ա. Ալպոյաճեան. Բզմիրի հայոց առաջնորդները, էջ 282:

⁵³ Դիւան հայոց պատմութեան, Գիրք Թ, Յովսեփ կաթողիկոս Արղութեան, մասն 1, 1778–1800, Թիֆլիս, 1911, էջ 126: 1791 թ. մինչև Բսահակի՝ Բայազետից Ջմյունհիա հասնելը, Ղուկասը նրան ևս «թուղթ» է գրել (ՄՄ, Կաթողիկոսական դիվան, թղթ. 6, վավ. 41):

⁵⁴ Տ. Պայյան. նշվ. աշխ., էջ 28:

⁵⁵ Հրանտ Ասատուր. Կոստանդնուպոլսյ հայերը եւ իրենց պատրիարքները, Ստանպուլ, 2011, էջ 128:

⁵⁶ Տե՛ս Ղուկաս կաթողիկոսի 1793 թ. նոյեմբերի կոնդակը Ջմյունհայի հայերին (ՄՄ, Կաթողիկոսական դիվան, թղթ. 243, վավ. 59, նաև՝ թղթ. 5, վավ. 46):

Նույն այդ կոնդակում, որտեղ Ղուկասը հայտնում էր Բսահակ վարդ. մահվան մասին, հավելում էր, որ Զմյուռնիայի նվիրակ և առաջնորդ է կարգում Դանիելին՝ «պատուիրելով նմա զի մեծ կոնդակն զոր տուեալ էաք Բսահակ վարդապետին հանգուցելոց, զայն ի յիւր անուն փոխեալ է»⁵⁷: 1793-ը, իբրև Դանիելի պաշտոնավարման սկիզբ, նշված է նաև Ալ. Երիցյանի աշխատության մեջ⁵⁸: Ա. Ալպոյաճյանը, մինչդեռ, Դանիելի պաշտոնավարման սկիզբն ու ավարտն է համարում 1797–1798 թթ., նույն անճշտությունը կրկնում է Տ. Պալյանը, իսկ Մ. Օրմանյանն, իր հերթին՝ 1796–1797 թթ.⁵⁹:

Կ. Պոլսից Դանիելը Զմյուռնիա է հասնում 1794 թ. օգոստոսին, որ փաստվում է նույն ամսին Ղուկասի կողմից զմյուռնացի Գալուստ քահանային գրած թղթից⁶⁰:

Հայտնի են Դանիելի և զմյուռնահայ վերնախավի որոշ անձանց միջև գծտությունները նոր առաջնորդի՝ իր պաշտոնատեղին գալուց ի վեր: Բանը հասավ այնտեղ, որ Դանիելի հակառակորդները «բազմակնիք մահսերօք» (հանրագրով) դիմեցին կաթողիկոսին, որ նա Դանիելին փոխարինի մեկ այլ առաջնորդով⁶¹: Դանիելին սատարում էր ազդեցիկ Մարգարը՝ Սպրոյան տոհմից: Զուր անցան կողմերին հաշտեցնելու՝ կաթողիկոսի և պատրիարք Զաքարիա Կաղզվանցու ջանքերը, որ նրանք գործադրեցին 1795–1797 թթ.⁶²: Կաթողիկոսը, ի դեպ, ենթադրում էր, որ գործը հաշտությամբ չի ավարտվելու, ուստի գրում էր Զաքարիա պատրիարքին, որ հաշտությունը չհաջողելու դեպքում մտադիր է Զմյուռնիայում Դանիելին փոխարինել եպ. Մարտիրոսով, իսկ իրեն՝ Դանիելին, նույն պաշտոնով ուղարկել Ռումելիա⁶³: Կաթողիկոսը կանխել էր իրադարձությունների ընթացքը. 1797 թ. Դանիելը մեկնում է Ռումելիա: Նա կաթողիկոս է ընտրվել 1801 թ.:

24. Մարտիրոս արք., 1797–1816:

Տ. Պալյանը նրա առաջնորդության սկիզբն է նշում 1798-ը, իսկ Ա. Ալպոյաճյանն անստույգ է համարում Հ. Քոսյանի նշած՝ 1800–1801 թթ. Զմյուռնիայի առաջնորդ Մարտիրոս Մյունյաց եպ. և՛ անունը, և՛ ժամանակը: Նա նկատում է, որ իրականում խոսքը վերաբերում է 1799–1801 թթ. միջոցների առաջնորդ Մարտիրոս Կեսարացուն և որ Հ. Քոսյանի այդ սխալը գալիս է ոչ ճիշտ ընթերցված մի հիշատակարանից⁶⁴: Միաժամանակ, Ալպոյաճյանը Մարտիրոսի պաշտոնավարման ժամանակն է համարում 1798–

⁵⁷ Նույն տեղում:

⁵⁸ Նիւթեր Ներսէս Ե-ի կենսագրութեան համար: Ժողովեաց Աղ. Երիցեանց, Թիֆլիս, 1877, էջ 27:

⁵⁹ Ա. Ալպոյաճեան. Առաջնորդութիւն հայոց Բզմիրի, 1904, 13/26 ապրիլի: Տ. Պալեան. նշվ. աշխ., էջ 59: Մ. Օրմանեան. նշվ. աշխ., էջ 3692:

⁶⁰ ՄՄ, Կաթողիկոսական դիվան, թղթ. 6, վավ. 40, էջ 36:

⁶¹ Դիւան հայոց պատմութեան, Գիրք Դ, Ղուկաս կաթողիկոս, Թիֆլիս, 1899, էջ 744:

⁶² ՄՄ, Կաթողիկոսական դիվան, թղթ. 6, վավ. 40, էջ 55–56:

⁶³ Նիւթեր Ներսէս Ե-ի կենսագրութեան համար, էջ 27:

⁶⁴ Տ. Պալեան. նշվ. աշխ., էջ 60: Ա. Ալպոյաճեան. Առաջնորդութիւն հայոց Բզմիրի, 1904, 14/27 ապրիլի: Տե՛ս նաև Հ. Քոսեան. Հայր Բ Զմյուռնիա, հ. 1, Վիեննա, 1899, էջ 113–114:

1810-ը՝ նկատելով նաև, որ իրեն հայտնի չէ՝ 1810-ից հետո նա շարունակել է պաշտոնավարել, թե ոչ⁶⁵: Մարտիրոսի առաջնորդության սկիզբը առավել ստույգ է նշված Ադ. Երիցյանի տվյալներով՝ 1797 թ., որովհետև գնդապետի երևելիների հետ Դանիելին հաշտեցնելու կաթողիկոսի և Ջաքարիա պատրիարքի անհաջող փորձերից հետո Դանիելը 1797 թ. փետրվարին մեկնում է Ռուսելիա⁶⁶, իսկ դրանից հետո կարող էր նույն տարվա ընթացքում հայտնվել Ջոնաթանիայում: Ի յրումն այս ամենի, 1801 թ. հուլիսին Մարտիրոսը գրում էր Դավիթ կաթողիկոսին. «Արդ... զի ահա Բ ամ եղև, որ ի նուիրակական գործոյ վախճան առեալ, միայն առաջնորդականին կեամք և մնամք գործն պարապեալ»⁶⁷: Ուրեմն, Մարտիրոսը դեռ 1799 թ. (կամ 1800 թ.) ավարտել է սովորաբար երեք տարի տևող նվիրակական պաշտոնը, որ սկիզբ էր առել առաջնորդության հետ միասին՝ 1797 թ.:

Այժմ վերադառնանք Մարտիրոսի պաշտոնավարման ավարտին, որ 1810-ով է ամրագրում Ա. Ալպոյաճյանը: Բայց Մարտիրոսը պաշտոնավարում էր 1812 թ., այդ տարվա դեկտեմբերի 18-ին նա նամակ է գրել Ներսես Աշտարակեցուն՝ հայտնելով Ջոնաթանիայում «ընդ ամին անցելոյ» ժանտախտի մասին⁶⁸: Ավելին, կա Էջմիածնի տնտեսական հաշիվների 1816 թ. մի մատյան, որտեղ նշված է. «Ընդ Մարտիրոս եպս.-էն եկեալ իզմիրցոց տուրքն եղև եօթանասուն և հինգ թուման»⁶⁹: Հետաքրքիր է, որ պահպանվել է Մարտիրոսի՝ 1811 թ. սեպտեմբերի 1-ի թվակիր կտակը, որ 1825 թ. հաստատել են գնդապետահայ «իշխանները»⁷⁰:

Դավիթ-Դանիելյան պայքարի տարիներին Մարտիրոսը Դավթի հուսալի կողմնակիցն էր, որ, հոգուտ իր պաշտպանյալի և համախոհի, գործի էր դնում իր ազդեցությունը ոչ միայն Էջմիածնի միաբանների, այլև Կ. Պոլսի բարձրաստիճան հոգևորականությամբ:

⁶⁵ Ա. Ալպոյաճյան. Առաջնորդություն հայոց Բզմիրի, 13/26 ապրիլի: Մարտիրոսի պաշտոնավարման ժամանակի խնդիրը ավելի է խճճվում Ն. Ակինյանի, մեր կարծիքով, ոչ հավաստի մի տեղեկությամբ, ըստ որի, Ջոնաթանիայում Ապրոյանների տոհմաձառով «գրադած է նաև Ջոնաթանիայի առաջնորդը՝ Մերոպ արքեպիսկոպոս՝ 1804-ին» (Ն. Ակինյան. Երեմիա Չելեպի Քեօմիրձեան, Վիեննա, 1933, էջ 239): Մերոպ արք. մասին մեզ այլ տվյալներ մատչելի չեն: Ընդհակառակը, Վիեննայի Մխիթարյանների մատենադարանում պահվում է մի վավերագիր, որի համաձայն, Ապրոյանների տոհմաձառը վավերագրերի հիման վրա կազմել է Ջոնաթանիայի առաջնորդ Մարտիրոսը և որ այդ վկայականը այդ նույն՝ 1804 թ. ապրիլի 20-ին, ստորագրել և հաստատել են մի խումբ քահանաներ ու աշխարհականներ (տե՛ս Յուզակ հայերէն ձեռագրաց Մխիթարեան Մատենադարանին ի Վիեննա, հ. Բ, կազմ. Յ. Ոսկեան, Վիեննա, 1963, էջ 333):

⁶⁶ Նիւթեր Ներսէս Ե-ի կենսագրութեան համար, էջ 27:

⁶⁷ ՄՄ, Կաթողիկոսական դիվան, թղթ. 11, վավ. 92:

⁶⁸ Նույն տեղում, թղթ. 29, վավ. 133:

⁶⁹ Նույն տեղում, վավ. 151:

⁷⁰ Նույն տեղում, թղթ. 22-բ, վավ. 52-ա:

յան շրջանում⁷¹: Նրա դեմ խմբվեցին, բնականաբար, Դանիելի կողմնակիցները, որ տեղի տվեց տնական երկպառակությունների⁷²: Մարտիրոսին վտանգավոր հակառակորդ էր համարում Դանիելը, ով Ալեքսանդր I-ին հղած գրության մեջ զանգատվում էր նրանից⁷³: Իր երկարատև առաջնորդության համար, որքան էլ այդ տարօրինակ է, Մարտիրոսը պարտական էր Դավիթ-Դանիելյան պայքարի վայրիվերումներին:

25. Փիլիպոս եպ., 1816–1821:

Ա. Ալպոյաճյանը վկայակոչում է 1820 թ. հոկտեմբերի 26, Իզմիր թվագրումով մի գրքի ընծայականը՝ «ի Փիլիպոս նուսստ եպիսկոպոսէ Զմիւռնոյս», հավելելով, թե «Ասով, անշուշտ, չէ կարելի թէ երբ եկած եւ երբ ձգած է Իզմիրը»⁷⁴: Այլ աղբյուրներ, սակայն, բավականաչափ տեղեկություններ են հայտնում ն՝ մեկի, ն՝ մյուսի մասին:

Փիլիպոսը հաջորդել է Մարտիրոսին նույն՝ 1816 թ., որ վկայում է Եփրեմ կաթողիկոսի 1816 թ. ապրիլի 15-ի կոնդակը՝ Փիլիպոսին Զմյուռնիայի նվիրակ և առաջնորդ նշանակելու ու Մարտիրոսին հետ՝ Էջմիածին կանչելու մասին⁷⁵: Ինքը՝ Փիլիպոսը, Զմյուռնիա է հասել 1816 թ. մայիսին⁷⁶: Փիլիպոսի պաշտոնավարման ժամանակ է, որ զմյուռնացի Հ. Մ. Վանանդեցի քահանան ընդօրինակել է Ստ. Լեհացու թ. Աբվինացուց թարգմանած «Գիրք հոգեաց եւ հրեշտակաց» երկը՝ 1817–1820 թթ.⁷⁷: 1816 թ. աշնանը և այնուհետև Փիլիպոսն իրականացրել է իր նվիրակական առաքելությունը Զմյուռնիայի շրջակա թեմերում՝ Մանիսա, Կասաբա, Պայանտրը, Էյդեմիշ և այլուր⁷⁸:

Իր տեղում տեսանք, որ այս առաջնորդն ունի իր անվանակիցը՝ ի դեմս դարձյալ Զմյուռնիայում 1779–1782 թթ. առաջնորդ եղած Փիլիպոսի: Ժամանակագրական կտրվածքով և տեսականորեն հնարավոր է, որ նրանք միևնույն անձը լինեն, սակայն, թվում է՝ նրանք տարբեր մարդիկ են. 1820 թ., վերջին Փիլիպոսի առաջնորդության ժամանակ գրված մի ձեռագրում տրված է նրա կենսագրությունը, որտեղ ասված է, որ

⁷¹ Դիւան հայոց պատմութեան, գիրք Դ, էջ 746: Հայտնի են նաև Կ. Պոլսի Գրիգոր պատրիարքի (ուս նգովել էր Դավիթը) փորձերը՝ «ոտիւք եւ ձեռք անխնամ» արտրելու Զմյուռնիայի առաջնորդին (Դիւան հայոց պատմութեան, Գիրք 2, կազմեց Գ. Աղանեան, Թիֆլիս, 1904, էջ 568):

⁷² Զմյուռնիայում Դավթին, ուրեմն և Մարտիրոսին պաշտպանում էին երևելիներ Մոսկով Հովհաննեսը, Ստ. Ազարյանը, Գ. Հարությունյանը և այլք, Դանիելին՝ թերևս, ամենաազդեցիկ անձը՝ Մարգար Ապրոյանն իր համախոհներով (տե՛ս Դիւան հայոց պատմութեան, Գիրք Է, մասն երկրորդ, Դավիթ կաթողիկոս, հրատ. Գ. Աղանեան, Թիֆլիս, 1909, էջ 164–165):

⁷³ Դիւան հայոց պատմութեան, Գիրք Ե, հրատ. Գ. Աղանեան, Թիֆլիս, 1902, էջ 290:

⁷⁴ Ա. Ալպոյաճեան. Առաջնորդութիւն հայոց Իզմիրի, 1904, 14/27 ապրիլի:

⁷⁵ ՄՄ, Կաթողիկոսական դիվան, թղթ. 243, վավ. 148:

⁷⁶ ՄՄ, ձեռ. 2718, էջ 77:

⁷⁷ Մայր ցուցակ ձեռագրաց սրբոց Յակոբեանց, հ. II, կազմ. Ն. Պողարեան. Յերուսաղէմ, 1967, էջ 615–616:

⁷⁸ ՄՄ, Կաթողիկոսական դիվան, թղթ. 29, վավ. 160, էջ 12, 33, 39–41, 46–47:

մինչև Զմյուռնիա գալը նա նվիրակ է եղել Կարինում, Տիգրանակերտում և Ամիդում, և ոչ մի խոսք չկա այդտեղ նախկինում առաջնորդ լինելու մասին⁷⁹:

Զարմանալի զուգադիպությամբ, սակայն, Փիլիպոսը, ինչպես և իր երբեմնի առաջնորդ անվանակիցը, ընդհարվել է զմյուռնահայ երևելիների հետ: 1819 թ. դեկտեմբերին Ներսես Աշտարակեցին զուր չէր գրում Մարգար Ապրոյանին, թե «յադագս որոմանցն երկպառակութիւն ոչ պակասելոց ի վիճակի յայդմիկ»⁸⁰: Այս բախումները շարունակվեցին նաև 1820 թ. և ընդհուպ մինչև Փիլիպոսի հեռանալը Էջմիածին՝ 1821 թ. մարտ⁸¹:

26. Ստեփանոս եպ. Ենովքյան, 1821–1825:

Ե՛վ Ա. Ալպոյաճյանը, և՛ Տ. Պալյանը խախտում են առաջնորդների հերթականությունը՝ Փիլիպոսի հաջորդը համարելով Ստեփանոս եպ. Աղավնուն⁸²: Փիլիպոսին, մինչդեռ, հաջորդել է ոչ թե Աղավնին, այլ վերջինիս անվանակիցը՝ Ստեփանոս եպ. Ենովքյանը, ով Զմյուռնիա է հասել 1821 թ. հունվարի 21-ին և ստանձնել առաջնորդական պաշտոնը, իսկ Փիլիպոսը Էջմիածին է ուղևորվել նույն տարվա մարտի 20-ին՝ Մանիսայից⁸³: Ինչ վերաբերում է Ստեփանոս եպ. Աղավնուն, ապա նա Զմյուռնիայում հայտնվել է ոչ թե որպես Էջմիածնական ավանդական առաջնորդ և նվիրակ, այլ Կ. Պոլսից առաքված պատրիարքական փոխանորդ, Ստ. Ենովքյանի հրաժարականից՝ 1825 թ. փետրվարից հետո⁸⁴:

Այն, որ Բ. դուռը պատրաստվում էր Զմյուռնիայի, և նույն կերպ, կայսրությունում գտնվող այլ թեմերի ենթակայությունը դուրս բերել Էջմիածնի իրավասությունից, Ստ. Ենովքյանին հայտնի էր դեռևս 1824 թ.: Կ. Պոլսում Էջմիածնի նվիրակ արք. Աստվածատուրին, ինչպես զգուշորեն գրում էր Ներսեսը Ստեփանոսին, «կասկածն հասարակաց» ձգտում է «դադարեցուցանել ի գործոց իւրոց»⁸⁵: Աստվածատուրի դեմ հարուցվող

⁷⁹ ՄՄ, ձեռ. 2718, էջ 76–76-ա:

⁸⁰ ՄՄ, Ներսես Աշտարակեցու արխիվ, թղթ. 165, վավ. 165:

⁸¹ Տե՛ս Դիւան հայոց պատմութեան, Գիրք Դ, էջ 746:

⁸² Ա. Ալպոյաճեան. Առաջնորդութիւն հայոց Իզմիրի, 14/27 ապրիլի, Տ. Պալեան. նշվ. աշխ., էջ 61:

⁸³ ՄՄ, Կաթողիկոսական դիվան, թղթ. 38, վավ. 108-ա: Ներսես Աշտարակեցին նոր առաջնորդի մտալուտ գալստյան մասին հայտնում է գործող առաջնորդ Փիլիպոսին՝ 1820 թ. դեկտեմբերին, եթե հավաստի է այս աղբյուրի թվագրումը: Նա գրում է, որ Էջմիածնի Ս. Ժողովի անդամներ Հովհ. Կարբեցին, Ստ. Ենովքյանը և Ստ. Թելավեցին մեկնել են Կ. Պոլիս, որտեղից բաժանվելու են՝ «ցրուեալք անդէն լինելոց են, մինն ի նոցանէ առ ձեզ՝ այդր Զմիւռնիոյ, մինն ի Պալիքէսեր և մինն ի Կեսարիայ (առաջնորդի պաշտոնով –Ա. Ի.) (ՄՄ, Ներսես Աշտարակեցու արխիվ, թղթ. 165, վավ. 408): Իրականում նշված հոգևորականները Կ. Պոլիս էին հասել դեռևս 1820 թ. օգոստոսի 12-ին, երբ պոլսահայ համայնքը բռնված էր դավանական հուզումներով (ՄՄ, Կաթողիկոսական դիվան, թղթ. 38, վավ. 108-բ):

⁸⁴ Տե՛ս շրանտ Ասատուր. նշվ. աշխ., էջ 166:

⁸⁵ ՄՄ, Ներսես Աշտարակեցու արխիվ, թղթ. 166, վավ. 161:

վտանգներին դիմակայելու նպատակով էր, որ Ստեփանոսը պետք է մեկներ Կ. Պոլիս: Այդ ակնհայտ է դառնում Ներսես Աշտարակեցու 1824 թ. դեկտեմբերի 24-ի թվակիր նամակից՝ ուղղված Ստեփանոսին, ընդամին, նա քանիցս պատվիրում է Զմյուռնիայի առաջնորդին՝ զգույշ լինել ավելորդ լրատվություն չտալու համար⁸⁶: Երևում է՝ Էջմիածինը փորձել է պահպանել Աստվածատուրի ներկայությունը Թուրքիայում՝ Զմյուռնիայում Ստեփանոսի առաջնորդական պաշտոնը նրան հատկացնելու գնով: Հենց այդ էլ խնդրում էին իրենց համախոսականում զմյուռնացիները պատրիարքին, այն, որ Աստվածատուրը ստանձնի իրենց հրաժարված առաջնորդ Ստեփանոսի պարտականությունները: Ինչպես գրում է Ստեփանոսը իր նամակում (1825 թ. մայիսի 5-ին), մերժելով այդ համախոսականը, պատրիարքը, ամիրանների խորհրդով մտադիր էր Զմյուռնիա ուղարկել, որպես պատրիարքական փոխանորդ, Պանտրմայի առաջնորդ Ստեփանոս արհիիին (նույն Աղավնուն)⁸⁷: Դա նշանակում էր, որ այլևս Էջմիածինը զրկվում է Զմյուռնիայի իր թեմից և այն անցնում է Կ. Պոլսի պատրիարքության տնօրինությանը: Ա. Ալպոյաճյանը, ի դեպ, կարծում է, և դժվար է նրան համաձայնել, թե «պատրիարքարանն առաջին անգամ 1825-ի սկզբները փորձ մը կընէ Բզմիրն իր թեմին կցելու՝ հոն դրկելով Ստեփանոս Աղանի եպս.-ը՝ պատրիարքական փոխանորդի տիտղոսով», որից հետո «երկրորդ փորձ մը ըրած է եւ այս անգամ յաջողած է»⁸⁸:

Ստեփանոսի վերոհիշյալ նամակը հիմնովին հերքում է այս հարցում պատրիարքարանի որևէ նախաձեռնության կամ փորձի մտահղացումը: Խոսքը վերաբերում է ոչ միայն Զմյուռնիայի, այլև ամբողջ Օսմանյան Թուրքիայում տերունի թեմերը վերացնելու, դրանք Էջմիածնի իրավասությունների շրջանակից դուրս բերելու ընդհանրական որոշմանը, որ կարող էր կայացնել միայն օսմանյան պետությունը: Կարապետ պատրիարքը զմյուռնացիներին իր մերժումը հիմնավորում է աներկբա հասցեագրումով: «... ըստ որում, – հայտնում է նա, – տնօրինուեցաւ, զի ամենայն նուիրակունք Աթոռոյն Էջմիածնի, որ յՕսմանեան տէրութիւն են, գնասցեն անդ (Էջմիածին – Ա. Խ.) փութով»⁸⁹: Դա երկրից նվիրակների վտարում էր նշանակում և, հիրավի, վերացվում էին ոչ միայն Զմյուռնիայի տերունի թեմը, այլև Էջմիածնապատկան մյուս բոլոր թեմերը Օսմանյան Թուրքիայում:

Ստեփանոս Ենովքյանը՝ Զմյուռնիայի տերունի թեմի վերջին նվիրակը և առաջնորդը, իր պաշտոնն ավարտեց այդ թեմի վերացումով՝ 1825 թ. սկզբներին⁹⁰:

Այսպիսին է, մոտավորապես, Զմյուռնիայի տերունի թեմի Էջմիածնական նվիրակների և առաջնորդների գավազանագրքի պատկերը, որը հետագա լրացումների ու

⁸⁶ Նույն տեղում:

⁸⁷ ՄՄ, Դիվան Կարապետ արքեպիսկոպոսի, թղթ. 163-բ, վավ. 786:

⁸⁸ Ա. Ալպոյաճեան. Առաջնորդութիւն հայոց Բզմիրի, 1904, 14/27 ապրիլի:

⁸⁹ ՄՄ, Դիվան Կարապետ արքեպիսկոպոսի, թղթ. 163-բ, վավ. 786:

⁹⁰ Նույն տեղում, վավ. 760:

Ճշտումների կարիք ունի: Բնչպես երևում է սույն շարադրանքից, շատ տարիների, անգամ տասնամյակների համար առաջնորդներ չեն հիշվում, որի պատճառը մասամբ աղբյուրների բացակայությունն է, իսկ հիմնականում այն, որ Էջմիածինը և քաղաքական, և Կ. Պոլսի պատրիարքության հետ աննպաստ մրցակցության պայմաններում ժամանակին թեմի առաջնորդներ չի կարողացել ուղարկել:

Զմյուռնիայի տերունի թեմի համազգային հեղինակության շնորհիվ նրա առաջնորդներից հինգը 1737–1801 թթ. ընթացքում ընտրվել են Էջմիածնի կաթողիկոսներ՝ Ղազար Ջահկեցին (1737), Աղեքսանդր եպ. Բյուզանդացին (Գարագաշ) (1753), Սահակ (Բսահակ) Ահազինը (1756, հրաժարվել է կաթողիկոսությունից), Ղուկաս Կարնեցին (1780) և Դանիել Սուրբառեցին (1801):

ГЛАВЫ СМИРНИНСКОЙ ЕПАРХИИ ТЭРУНИ՝

АЛБЕРТ ХАРАТЯН

Резюме

Восстановление хронологического списка глав Смирнинской епархии тэруни непосредственно связано с Эчмиадзинской епархией тэруни, являющей собой вековую историю института церкви. Начало восстановлению этого списка было положено исследованиями известных историографов – А. Алпояджяна и епископа Т. Паляна, однако список нуждается в дальнейшем уточнении и восполнении. История Смирнинской епархии тэруни, а значит, и списка ее глав восходит ко второму десятилетию XVII в., в частности к деятельности эчмиадзинского главы Прконтоша Карапета и завершается периодом деятельности архиепископа Степаноса Еновкяна в 1821–1825 гг. Епархия и деятельность возглавлявших ее духовных лиц имела важнейшее значение для Эчмиадзина. Смирнинское купечество и его роль в международной торговле, его традиционные связи с Эчмиадзинским католикосатом всегда были в центре внимания последнего. На протяжении долгого исторического отрезка – 1731–1801 гг. – пять представителей этой епархии были избраны католикосами Эчмиадзина, что свидетельствует об общенациональном авторитете Смирнинской армянской колонии и ее влиятельной роли.

HEADS OF THE TERUNI DIOCESE OF SMYRNA

ALBERT KHARATYAN

Summary

Restoration of the Chronological List of heads of the diocese of Smyrna is closely related to history of Etchmiatsin *teruni* (belonging to Etchmiatsin) diocese as a religious institution. The

restoration of the Chronological List takes its beginning with the researches of eminent scholars A. Alpoyachyan and bishop T. Palyan, whose additions and corrections still need to be continued. The history of the diocese of Smyrna, so the list of the heads of the diocese begins from the 2nd decade of the 17th century, in the face of Prkntosh Karapet - the head of the diocese from Etchmiatsin, and ends with the activities of archbishop Stepanos Yenovkyan in 1821–1825. The Diocese and the Activity of the heads had a great importance for Etchmiatsin. The Armenian merchants from Smyrna who had a major role in the international trade and traditional ties with Catholicosate of Etchmiatsin have always been in the center of attention of the latter's. Five heads of this diocese were elected Catholicoses of Etchmiatsin in 1731–1801: this fact proves the nationwide reputation and influential position of the Armenian community in Smyrna.